

Di Zenâr a Lui su lis stradis de region
IL FURLAN AL VIAZE CU LA CORIERE
Ultin at de campagne promozionâl de lenghe furlane
ideade dal Cirf de Universitât dal Friûl

Ocjo al furlan su lis stradis de region. La campagne di promozion de marilenghe, pensade dal Centri Interdipartimentâl di Ricerche su la culture e la lenghe dal Friûl (Cirf) de Universitât dal Friûl, si sierarà cuntun viaç in coriere, di Zenâr fintremai ae metât di Lui, tra lis provinciis di Udin, Gurize e Pordenon. Cuatri autobus extra urbans, doi che a partissin de stazion di Udin, un di chê di Gurize e un di chê di Pordenon, a ziraran di fat pal teritori regional metint fûr carteui cu la formule “F=MC² Furlan mieç di comunicazion al cuadrât”.

La scree de campagne di promozion de lenghe e je dal prin di Novembar dal 2006: di chê volte, la campagne si è disvilupade midiant di spots publicitarii trasmetûts tes salis cinematografichis plui grandis de region, ma ancie in gracie di messaçs pe radio, di publicazions su giornâi specifici e su la cjarte stampade, o cu la distribuzion di cartulinis e di segnelibris, adesîfs e manifescj. Par ducj i interessâts, i materiâi si distribuissin al Cirf (www.uniud.it/cirf), li de Universitât, in vie Petracco 6, a Udin. Inte stesse sede si pues usufruî dai servizis dal Sportel di lenghe furlane, che si pues contatâ ancie la numar 0432 5564580, o pûr vie e-mail (cirf@uniud.it). La campagne promozional «e je stade – e comente Piera Rizzolatti, direttore dal Cirf – une biele prove pal Cirf e pal Ateneu di Udin. Pe prime volte o vin vût a ce fâ cuntune campagne in grande scjale pe promozion de lenghe furlane, leade al mont de tecnologije, de sience e de inovazion».

«La formule F=MC² – e spiege Priscilla De Agostini dal Cirf, coordenadore dal progetto -, che e ven di chê di Einstein E=MC², sinonim universâl di discuverte scientifice, e rimarche l'aspett une vore inovatîf dal doprà il furlan tant che lengaç scientific, tecnologic e filosofic». Tai ultins agns, il studi, la ricerche continue, lis publicazions dal setôr, come cualchi riviste scientifiche in lenghe furlane, e il fat di vê prontâ imprescj linguistics specifici, «a àn contribuît – e rimarche Rizzolatti - al procès di insiorament continui e di evoluzion dal furlan». «La lenghe furlane – e siere De Agostini – e à vuê la possibilità di rappresentâ ad implem la realtât e di afrontâ nivei alts e diversificâts di comunicazion, e la discuverte di cheste gnove formule F=MC², dute par furlan, e je sore il dut un ricognosciment des potenzialitâts concretis di cheste lenghe».